



## ԿՈՌՈՒՊՑԻԱՅԻ ԿԱՆԽԱՐԳԵԼՄԱՆ ՀԱՆՁՆԱԺՈՂՈՎ

ԵԶՐԱԿԱՑՈՒԹՅՈՒՆ 08/2022-2023

### ԱՐՄԵՆ ԳԵՐԱՍԻՄԻ ՉԱՐՉՅԱՆԻ ԿՈՂՄԻՑ ԱՆՀԱՄԱՏԵՂԵԼԻՈՒԹՅԱՆ ՊԱՀԱՆՋՆԵՐԻ ԽԱԽՏՄԱՆ ԲԱՅԱԿԱՅՈՒԹՅԱՆ ՎԵՐԱԲԵՐՅԱԼ

ք. Երևան

27 փետրվարի, 2023 թվական

Կոռուպցիայի կանխարգելման հանձնաժողովը, կազմով՝ Հ. Հարությունյանի, Ն. Համբարձումյանի, Մ. Գալստյանի, Լ. Ալեքսանյանի, (այսուհետ՝ Հանձնաժողով), քննության առնելով Արմեն Գերասիմի Չարչյանի կողմից անհամատեղելիության պահանջների առերևույթ խախտման վերաբերյալ 2022 թվականի նոյեմբերի 30-ին հարուցված թիվ 08/2022 վարույթի նյութերը.

*պարզեց.*

#### **I. Նախապայմանություն**

1. Հանձնաժողովը, հիմք ընդունելով «Կոռուպցիայի կանխարգելման հանձնաժողովի մասին» օրենքի 23-րդ հոդվածի 1-ին մասի 1-ին կետը և հաշվի առնելով Հանձնաժողովի հանրային ծառայողների վարքագծի վերահսկողության վարչության 2022 թվականի աշխատանքային ծրագրով հաստատված միջոցառումներով նախատեսված՝ Հանձնաժողովի կողմից Ազգային ժողովի պատգամավորների անհամատեղելիության պահանջների պահպանման ստուգման

շրջանակում իրականացված Արմեն Գերասիմի Չարչյանի 2021 թվականի տարեկան շահերի հայտարարագրում (այսուհետ՝ Հայտարարագիր) ներկայացված համապատասխան տվյալների ստուգման արդյունքները, արձանագրել է հետևյալը.

➤ Իրավաբանական անձանց պետական ռեգիստրի առցանց իրական ռեժիմի ուսումնասիրության արդյունքներով հայտնաբերված տվյալների համաձայն՝ Արմեն Գերասիմի Չարչյանը 2016 թվականի մայիսի 4-ից հանդիսանում է «ԱԼՄԱԶ-1» ՍՊ ընկերության (ՀՎՀՀ 00152596, այսուհետ նաև՝ Ընկերություն) 5 %-ի բաժնետեր:

➤ Արմեն Գերասիմի Չարչյանը Հայտարարագրում Ընկերությունում բաժնեմասնակցության, ինչպես նաև իր բաժնեմասը հավատարմագրային կառավարման հանձնելու վերաբերյալ տվյալներ չի հայտարարագրել:

2. Արմեն Գերասիմի Չարչյանը ստանձնել է Ազգային ժողովի պատգամավորի պաշտոնը **2021 թվականի օգոստոսի 2-ին:**

3. 2022 թվականի նոյեմբերի 30-ին Հանձնաժողովը կայացրել է թիվ 08/2022 որոշումը՝ Ազգային ժողովի պատգամավոր Արմեն Գերասիմի Չարչյանի կողմից անհամատեղելիության պահանջների առերևույթ խախտման հիմքով վարույթ հարուցելու մասին:

4. Հանձնաժողովը 2022 թվականի դեկտեմբերի 5-ին վարույթ հարուցելու մասին որոշումը թիվ Ե-01/3009-2022 գրությամբ սուրհանդակային ծառայության միջոցով ուղարկել է Արմեն Գերասիմի Չարչյանին՝ միաժամանակ պահանջելով ներկայացնել պարզաբանում «ԱԼՄԱԶ-1» ՍՊ ընկերությունում իր բաժնեմասը հավատարմագրային կառավարման հանձնելու հարցի առնչությամբ, և դրան կցել փաստարկների հիմնավորվածությունը հավաստող նյութեր, ինչի հետադարձ հավաստումը չի վերադարձվել Հանձնաժողով:

5. 2022 թվականի դեկտեմբերի 28-ին Ազգային ժողովի նախագահին է հասցեագրվել թիվ Ե-01/3225-2022 գրությունը, ինչպես նաև հանձնման ենթակա փաստաթղթերը՝ փակ ծրարով, Արմեն Գերասիմի Չարչյանին ուղղված ծանուցումն անձամբ նրան հանձնելու խնդրանքով, որը ստացվել է վերջինիս կողմից 2023 թվականի հունվարի 13-ին (հիմք՝ 01/3225-2022 ուղեկցող գրություն):

6. Արմեն Գերասիմի Չարչյանի կողմից օրենքով սահմանված տասնօրյա ժամկետում Հանձնաժողով չի ներկայացվել պարզաբանում «ԱԼՄԱԶ-1» ՍՊ

ընկերությունում իր բաժնեմասը հավատարմագրային կառավարման հանձնելու հարցի առնչությամբ:

7. «ԱԼՄԱԶ-1» ՍՊ ընկերությունում Արմեն Չարչյանի բաժնեմասը հավատարմագրային կառավարման հանձնելու հարցի վերաբերյալ տվյալներ ստանալու, ինչպես նաև անհամատեղելիության պահանջների պահպանման, հնարավոր այլ խախտումներ ի հայտ բերելու նպատակով ուսումնասիրվել են Արդարադատության նախարարության իրավաբանական անձանց պետական ռեգիստրի էլեկտրոնային միասնական գրանցամատյանում առկա տվյալները, ինչպես նաև կատարվել են հարցումներ 2022 թվականի դեկտեմբերի 28-ին և 2023 թվականի հունվարի 12-ին Արդարադատության նախարարության իրավաբանական անձանց պետական ռեգիստրի գործակալություն, 2022 թվականի դեկտեմբերի 28-ին՝ «Հայաստանի Կենտրոնական Դեպոզիտարիա» ԲԲԸ, 2023 թվականի հունվարի 19-ին և հունվարի 20-ին Պետական եկամուտների կոմիտեին, ինչպես նաև այլ կազմակերպություններ:

## **II. Վարույթի մասնակցի ներկայացրած դիրքորոշում ու պարզաբանումներ**

Արմեն Գերասիմի Չարչյանը վարույթում քննարկվող հարցի առնչությամբ դիրքորոշում չի ներկայացրել:

## **III. Աժ պատգամավորի գործունեությանն առնչվող տեղեկություններ**

Ազգային ժողովի պաշտոնական կայքից (<http://www.parliament.am/deputies.php?sel=details&ID=1475&lang=arm>) իրական ռեժիմում ստացված տեղեկատվության համաձայն՝ Արմեն Չարչյանը 2021թ. հունիսի 20-ին Աժ պատգամավոր է ընտրվել «Հայաստան» կուսակցությունների դաշինքի համապետական ընտրական ցուցակով: 2021 թվականի օգոստոսի 2-ից փաստացի ստանձնել է Ազգային ժողովի պատգամավորի պաշտոնը:

#### **IV. Վարույթի համար էական նշանակություն ունեցող փաստեր**

1. Արմեն Գերասիմի Չարչյանը Ազգային ժողովի պատգամավորի պաշտոնը ստանձնել է 2021 թվականի օգոստոսի 2-ին:

2. Վարույթի իրականացման շրջանակներում Հանձնաժողովի կողմից Արդարադատության նախարարության իրավաբանական անձանց պետական ռեգիստրի գործակալություն 2022 թվականի դեկտեմբերի 28-ին կատարված Ե-01/3241-2022 հարցմանն ի պատասխան 2023 թվականի հունվարի 16-ին 25.8/1765-2023 գրությամբ ստացված տեղեկատվության համաձայն՝ «ԱԼՄԱԶ-1» ՍՊ ընկերությունը հանդիսանում է առևտրային կազմակերպություն, հիմնադրվել է 2016 թվականի մարտի 31-ին, իսկ Արմեն Չարչյանի բաժնեմասը նշված ընկերությունում կազմում է 5 %: Նույն տեղեկատվության համաձայն՝ «ԱԼՄԱԶ-1» ՍՊ ընկերության լուծարման գործընթացում գտնվելու կամ գործունեության դադարման մասին տվյալներ պետական ռեգիստրի գործակալության միասնական գրանցամատյանում գրառված չեն:

3. Արմեն Գերասիմի Չարչյանն իր 2021 թվականի տարեկան շահերի հայտարարագրում «Դ.1 Մասնակցությունը առևտրային կազմակերպություններում» և «Դ.3 Պաշտոն զբաղեցնող անձի մասնակցությամբ առևտրային կազմակերպությունում բաժնեմասը հավատարմագրային կառավարման հանձնելը» բաժիններում «ԱԼՄԱԶ-1» ՍՊ ընկերության վերաբերյալ տվյալներ չի ներկայացրել:

4. Վարույթի իրականացման շրջանակներում Հանձնաժողովի կողմից Հայաստանի Հանրապետության պետական եկամուտների կոմիտեին 2023 թվականի հունվարի 20-ին ուղղված Ե-01/122-2023 հարցմանն ի պատասխան 2023 թվականի հունվարի 24-ին ստացված թիվ 01/71-6/4273-2023 գրությամբ տրամադրված տեղեկատվության համաձայն՝ «ԱԼՄԱԶ-1» ՍՊ ընկերությունը 2021-2022 թվականներին **չի գրանցել իրացման շրջանառություն, ինչպես նաև չի ստացել շահույթ:**

5. Վարույթի իրականացման շրջանակներում Հանձնաժողովի կողմից 2023 թվականի հունվարի 19-ին Հայաստանի Հանրապետության պետական եկամուտների կոմիտեին ուղղված Ե-01/117-2023 գրությամբ կատարված հարցմանն ի

պատասխան 2023 թվականի հունվարի 24-ին ստացված թիվ Մ-333-2023 գրությամբ տրամադրվել է տեղեկատվություն Արմեն Չարչյանի կողմից 2021 թվականի հունվար ամսից մինչև 2022 թվականի դեկտեմբերն ընկած ժամանակահատվածում ստացված եկամուտների վերաբերյալ, որի համաձայն՝ Արմեն Չարչյանը նշված ժամանակահատվածում ստացել է աշխատավարձ և դրան հավասարեցված այլ վճարումներ Հայաստանի Հանրապետության ազգային ժողովի աշխատակազմից, 2022 թվականի մայիսից մինչև նոյեմբեր ամիս ստացել է աշխատանքային վարձատրություն քաղաքացիաիրավական պայմանագրով «Իզմիրյան» բժշկական կենտրոնից, 2021 թվականի օգոստոսից մինչև 2022 թվականի դեկտեմբեր ստացել է աշխատավարձ և դրան հավասարեցված այլ վճարումներ Երևանի Մխիթար Հերացու անվան պետական բժշկական համալսարանից:

Նշված տեղեկատվության շրջանակներում «Էկենգ» ՓԲԸ փոխգործելիության հարթակի միջոցով Պետական եկամուտների կոմիտեի առցանց հարթակից ստացվել են տվյալներ առ այն, որ Արմեն Չարչյանը 1992 թվականի մարտի 21-ից առ այսօր գրառեցնում է Երևանի Մխիթար Հերացու անվան պետական բժշկական համալսարանում ամբիոնի վարիչի պաշտոն:

6. 2023 թվականի փետրվարի 7-ին Հանձնաժողովի կողմից թիվ 01/244-2023 գրությամբ հարցում է կատարվել «Իզմիրյան» բժշկական կենտրոնի տնօրենի ժամանակավոր պաշտոնակատարին՝ պահանջելով Արմեն Գերասիմի Չարչյանի կողմից 2022 թվականի մայիսից մինչև 2022 թվականի նոյեմբերն ընկած ժամանակահատվածում «Իզմիրյան» բժշկական կենտրոնից ստացած աշխատանքի վարձատրության համար հիմք հանդիսացող քաղաքացիաիրավական պայմանագրերի լուսապատճենները, որոնք 2023 թվականի փետրվարի 20-ին 64/23 գրությամբ տրամադրվել են Հանձնաժողովին:

7. 2023 թվականի փետրվարի 9-ին 01/243-2023 գրությամբ հարցում է կատարվել Երևանի Մխիթար Հերացու անվան պետական բժշկական համալսարանի ռեկտորին՝ խնդրելով Հանձնաժողովին տրամադրել Արմեն Չարչյանի և Երևանի Մխիթար Հերացու անվան պետական բժշկական համալսարանի միջև աշխատանքային հարաբերությունների ծագման համար հիմք հանդիսացող

փաստաթղթերը, որոնք 2023 թվականի փետրվարի 15-ին Մ-645-2023 գրությամբ տրամադրվել են Հանձնաժողովին:

**V. Անհամապեղելիության պահանջին առաջադրվող՝ ներպետական օրենսդրական կարգավորումներ**

1. Հայաստանի Հանրապետության Սահմանադրության 95-րդ հոդվածով սահմանված է, որ **պատգամավորը չի կարող** զբաղեցնել իր կարգավիճակով չպայմանավորված պաշտոն պետական կամ տեղական ինքնակառավարման այլ մարմիններում, որևէ պաշտոն՝ առևտրային կազմակերպություններում, **զբաղվել ձեռնարկատիրական գործունեությամբ**, կատարել վճարովի այլ աշխատանք, բացի գիտական, կրթական և ստեղծագործական աշխատանքից:

2. «Հայաստանի Հանրապետության Ազգային ժողովի պատգամավորի գործունեության երաշխիքների մասին» օրենքի 2-րդ հոդվածի 1-ին մասով ամրագրված է.

«Սահմանադրության 95-րդ հոդվածին համապատասխան՝ պատգամավորը չի կարող զբաղեցնել իր կարգավիճակով չպայմանավորված պաշտոն պետական կամ տեղական ինքնակառավարման այլ մարմիններում, որևէ պաշտոն՝ առևտրային կազմակերպություններում, զբաղվել ձեռնարկատիրական գործունեությամբ, կատարել վճարովի այլ աշխատանք, բացի գիտական, կրթական և ստեղծագործական աշխատանքից:

Իսկ նույն օրենքի 2-րդ հոդվածի 2-րդ մասով ամրագրված է, որ պատգամավորական մանդատն ստանալուց հետո՝ **մեկ ամսվա ընթացքում, պատգամավորը պարտավոր է՝**

1) դուրս գալ անհատ ձեռնարկատիրոջ պետական հաշվառումից,

2) ազատվել առևտրային կազմակերպություններում զբաղեցրած պաշտոնից,

3) դուրս գալ առևտրային կազմակերպություններից կամ դրանց կանոնադրական կապիտալում իր բաժնեմասն ամբողջությամբ հանձնել հավատարմագրային կառավարման,

4)իրաժարվել առևտրային կազմակերպությունում ուրիշի գույքի հավատարմագրային կառավարումից,

5) ազատվել պետական կամ տեղական ինքնակառավարման մարմիններում զբաղեցրած պաշտոններից, բացառությամբ սույն հոդվածի 5-րդ մասում նշված պաշտոնների,

6) ազատվել վճարովի հիմունքներով աշխատանքից, բացառությամբ գիտական, կրթական կամ ստեղծագործական աշխատանքի:»:

3. Նույն օրենքի 6-րդ հոդվածով սահմանված է նաև, որ «Հայաստանի Հանրապետության Ազգային ժողովի պատգամավորի գործունեության երաշխիքների մասին» օրենքի իմաստով՝ ձեռնարկատիրական գործունեություն, ինչպես նաև գիտական, կրթական կամ ստեղծագործական աշխատանք է համարվում «**Հանրային ծառայության մասին**» օրենքով սահմանված համապատասխան գործունեությունը կամ աշխատանքը:

4. «**Հանրային ծառայության մասին**» օրենքի (այսուհետ՝ նաև **Օրենք**) 4-րդ հոդվածի 2-րդ մասի համաձայն՝ **հանրային պաշտոնը** դասակարգվում է խմբերի՝ **պետական** և համայնքային: Նույն հոդվածի համաձայն՝ պետական պաշտոնները դասակարգվում են տեսակների՝ **քաղաքական**, վարչական, ինքնավար և հայեցողական:

5. Օրենքի 5-րդ հոդվածի 2-րդ մասի համաձայն՝ Ազգային ժողովի պատգամավորի պաշտոնը հանդիսանում է **պետական քաղաքական պաշտոն**:

6. Օրենքի (մինչև «Հանրային ծառայության մասին» օրենքում լրացումներ և փոփոխություններ կատարելու մասին» 2022 թվականի դեկտեմբերի 7-ի ՀՕ-540-Ն օրենքի ուժի մեջ մտնելը գործող խմբագրությամբ) 31-րդ հոդվածի 1-ին մասի համաձայն՝ **հանրային պաշտոն զբաղեցնող անձինք** (բացառությամբ համայնքի ավագանու անդամների) և հանրային ծառայողները **չեն կարող** զբաղեցնել իրենց կարգավիճակով չպայմանավորված պաշտոն պետական կամ տեղական ինքնակառավարման այլ մարմիններում, որևէ պաշտոն՝ առևտրային կազմակերպություններում, **զբաղվել ձեռնարկատիրական գործունեությամբ**, կատարել վճարովի այլ աշխատանք, բացի գիտական, կրթական և ստեղծագործական աշխատանքից:

7. Նույն հոդվածի 5-րդ մասի համաձայն՝ հանրային պաշտոն զբաղեցնող անձինք և հանրային ծառայողները պաշտոնում **նշանակվելուց (ընտրվելուց) հետո՝ մեկ ամսվա ընթացքում**, պարտավոր են ապահովել սույն հոդվածի 1-ին մասով սահմանված պահանջների կատարումը:

8. Նույն հոդվածի 7-րդ մասի 3-րդ կետի համաձայն՝ սույն օրենքի իմաստով՝ ձեռնարկատիրական գործունեություն է համարվում՝ (...) **առևտրային կազմակերպության մասնակից լինելը**, բացառությամբ այն դեպքի, երբ առևտրային կազմակերպության մասնակցի բաժնեմասն ամբողջությամբ հանձնվել է հավատարմագրային կառավարման:

9. ՀՀ քաղաքացիական օրենսգրքի 954-րդ հոդվածի 1-ին մասի համաձայն՝ գույքի հավատարմագրային կառավարման պայմանագրով մեկ կողմը (կառավարման հիմնադիրը) որոշակի ժամկետով գույք է հանձնում մյուս կողմի (հավատարմագրային կառավարչի) հավատարմագրային կառավարմանը, իսկ մյուս կողմը պարտավորվում է այդ գույքի կառավարումն իրականացնել ի շահ կառավարման հիմնադրի կամ նրա նշած անձի (շահառուի):

10. «Կոռուպցիայի կանխարգելման հանձնաժողովի մասին» օրենքի 27-րդ հոդվածի 1-ին մասի համաձայն՝ ի թիվս այլ դեպքերի, Հանձնաժողովը կարող է անհամատեղելիության պահանջների, այլ սահմանափակումների, վարքագծի կանոնների խախտումների և իրավիճակային շահերի բախման վերաբերյալ վարույթներ հարուցել **Հանձնաժողովի նախաձեռնությամբ՝ հայտարարագրերը վերլուծելիս առերևույթ խախտումներ կամ դեպքեր հայտնաբերելու դեպքում**:

11. «Կոռուպցիայի կանխարգելման հանձնաժողովի մասին» օրենքի 33-րդ հոդվածի համաձայն՝ Հանձնաժողովը վարույթի արդյունքում խախտման կամ դեպքի վերաբերյալ ընդունում է եզրակացություն:

Նույն հոդվածի 2-րդ մասի համաձայն՝ վարույթի արդյունքում Հանձնաժողովն ընդունում է եզրակացություն պաշտոն զբաղեցնող անձի կողմից անհամատեղելիության պահանջների կամ այլ սահմանափակումների խախտման առկայության կամ բացակայության մասին կամ համապատասխան պաշտոն զբաղեցնող անձի կողմից վարքագծի կանոնների խախտման առկայության կամ բացակայության մասին, իսկ իրավիճակային շահերի բախման դեպքի



կապակցությամբ՝ շահերի բախման իրավիճակի առկայության կամ բացակայության մասին:

## **VI. Հանձնաժողովի պարճառաբանություններն ու եզրահանգումը**

1. Պատգամավորի հանրային պաշտոն զբաղեցնող անձանց համար ձեռնարկատիրական գործունեությամբ զբաղվելու սահմանափակումն ամրագրված է ինչպես Սահմանադրությամբ, այնպես էլ «Հայաստանի Հանրապետության Ազգային ժողովի պատգամավորի գործունեության երաշխիքների մասին» և «Հանրային ծառայության մասին» օրենքներով:

2. Ձեռնարկատիրական գործունեությամբ զբաղվելու սահմանափակումը, մասնավորապես, չի արգելում հանրային պաշտոն զբաղեցնող անձանց և հանրային ծառայողներին որպես սեփականություն ունենալ բաժնեմաս առևտրային կազմակերպությունում: Ավելին, օրենսդիրը չի զրկում հանրային պաշտոն զբաղեցնող անձանց և հանրային ծառայողներին սեփականության իրավունքով իրենց պատկանող գույքը օգտագործելու և տնօրինելու իրավունքից, այլ տվյալ պաշտոնը զբաղեցնելու հանգամանքով պայմանավորված՝ նախատեսում է օրենքի իմաստով ձեռնարկատիրական գործունեություն համարվող առևտրային կազմակերպությունում ունեցած բաժնեմասնակցության տնօրինման կոնկրետ եղանակ, այն է՝ պաշտոնում նշանակվելուց (ընտրվելուց) հետո մեկ ամսվա ընթացքում առևտրային կազմակերպության մասնակցի բաժնեմասն (բաժնետոմս, փայ) ամբողջությամբ հանձնել հավատարմագրային կառավարման:

3. Գույքի տնօրինման կոնկրետ եղանակ սահմանելուն զուգահեռ օրենսդիրը հանրային պաշտոն և հանրային ծառայության պաշտոն զբաղեցնող անձանց համար սահմանել է համապատասխան երաշխիքներ, համաձայն որոնց՝ վերջիններս հնարավորություն կունենան պաշտոնի նշանակվելուց կամ ընտրվելուց հետո մեկամսյա ժամկետում վերացնելու իրենց զբաղեցրած պաշտոնի հետ անհամատեղելի այլ գործունեությունը, դրանով իսկ բացառելով կամ նվազագույնի հասցնելով հանրային պաշտոն և հանրային ծառայության պաշտոն զբաղեցնող անձանց մոտ շահերի բախման իրավիճակները: Նման կարգավորումները որևէ կերպ չեն

խաթարում անձի՝ Սահմանադրությամբ ամրագրված, սեփականության հիմնարար իրավունքը, քանի որ անձը, հանձնելով առևտրային կազմակերպությունում իր բաժնեմասը հավատարմագրային կառավարման, չի փոխանցում իր սեփականության իրավունքը հավատարմագրային կառավարչին, այլ այդ կերպ իրացնում է իր այդ իրավունքը:

4. Ազգային ժողովի պատգամավորն ունի պետական իշխանության օրենսդիր, ներկայացուցչական մարմնի անդամի սահմանադրաիրավական կարգավիճակ, ինչն անհամատեղելի է գործունեության որոշակի տեսակների հետ: Հանրային պաշտոն զբաղեցնող անձանց համար օրենսդրությամբ սահմանված որոշակի արգելքների ու սահմանափակումների հիմնական նպատակը ***կոռուպցիայի կանխարգելումն է, այդ թվում՝ շահերի հնարավոր բախման իրավիճակների բացառումը:***

Իրավական սահմանափակումների ներքո ենթադրվում է, որ պաշտոնավարման ողջ ժամանակահատվածում հանրային պաշտոն զբաղեցնող անձը պարտավորվում է գործունեություն իրականացնել իր պաշտոնի նկատմամբ սահմանված իրավական որոշակի սահմանափակումների շրջանակներում: Հետևաբար, ընտրվելով հանրային պաշտոնում՝ իրավունքների ու պարտականությունների հետ մեկտեղ պատգամավորը ստանձնում է բազմատեսակ սահմանափակումների ներքո գործելու պարտականություն, որը հետապնդում է խորհրդարանում պատգամավորի կողմից բացառապես օրենսդիր և ներկայացուցչական գործառույթների իրականացման և ձեռնարկատիրական գործունեությամբ զբաղվող անձանց խորհրդարան մուտքը բացառելու ապահովման օրինաչափ նպատակը:

5. Վերլուծելով սույն գործով կիրառելի օրենսդրական կարգավորումները, պարզ է դառնում, որ օրենսդիրը սահմանել է հստակ ժամկետ՝ առևտրային կազմակերպության մասնակցի բաժնեմասը հավատարմագրային կառավարման հանձնելու համար, և տվյալ հնարավորությունը սահմանափակել է անձի՝ հանրային պաշտոնում կամ հանրային ծառայության պաշտոնում նշանակվելու (ընտրվելու) դեպքով: Այսինքն, օրենսդիրը սահմանել է պայմաններ հանրային պաշտոն կամ հանրային ծառայության պաշտոն զբաղեցնող անձի՝ առևտրային կազմակերպությունում մասնակցությունը ձեռնարկատիրական գործունեություն չհամարվելու համար: Դրանք են՝ երբ անձը մասնակից է եղել առևտրային

կազմակերպությանը մինչև պաշտոնի նշանակվելը և, երբ պաշտոնի նշանակվելուց հետո առևտրային կազմակերպության մասնակցի բաժնեմասն օրենքով սահմանված ժամկետում ամբողջությամբ հանձնվել է հավատարմագրային կառավարման:

6. Այսպես, 2021 թվականի օգոստոսի 2-ից Արմեն Չարչյանը հանդիսանում է պետական քաղաքական պաշտոն զբաղեցնող անձ, և նրա գործունեության նկատմամբ տարածվում են Սահմանադրության 95-րդ, «Հայաստանի Հանրապետության Ազգային ժողովի պատգամավորի գործունեության երաշխիքների մասին» օրենքի 2-րդ և «Հանրային ծառայության մասին» օրենքի 31-րդ հոդվածի կարգավորումները: Այսինքն, Արմեն Չարչյանը պարտավոր էր պաշտոնը ստանձնելուց հետո մեկ ամսվա ընթացքում Ընկերության իր բաժնեմասը օրենքով սահմանված կարգով հանձնել հավատարմագրային կառավարման: Այնուամենայնիվ, Հանձնաժողովը հարկ է համարում վերոնշյալ փաստերը և դրանց վերաբերելի իրավակարգավորումները վերլուծել օրենքի **ձևական և բովանդակային տեսանկյունից:**

7. Սույն վարույթի շրջանակներում Հանձնաժողովն արձանագրում է, որ Օրենքի ձևական տեսանկյունից խախտվել են հանրային պաշտոն զբաղեցնող անձի նկատմամբ տարածվող անհամատեղելիության պահանջները, և դա դրսևորվել է Արմեն Չարչյանի կողմից պաշտոն ստանձնելուց հետո «ԱԼՄԱԶ-1» ՍՊ ընկերությունում իր բաժնեմասն օրենքով սահմանված կարգով հավատարմագրային կառավարման չհանձնելու արարքով: Հանձնաժողովը հարկ է համարում Արմեն Չարչյանի կողմից կատարված առերևույթ խախտմանն անդրադառնալ Օրենքի՝ ձեռնարկատիրական գործունեությամբ զբաղվելու արգելքի բովանդակային տեսանկյունից, ուստի և, նշված արարքը անհրաժեշտ է համարում դիտարկել դրա բովանդակային դրսևորումների շրջանակում՝ գնահատելով սույն գործով ձեռք բերված ապացույցները:

8. Նշվածի համատեքստում, ելնելով պաշտոնատար անձի կողմից ձեռնարկատիրական գործունեությամբ զբաղվելու օրենսդրական արգելքի վերաբերյալ դրույթների բովանդակային նշանակությունից, ակնհայտ է դառնում, որ էական է արարքում երկու հատկանիշների առկայությունը՝ անձի կողմից իր բաժնեմասնակցության փաստի ուժով համապատասխան գործողությունների

կատարմամբ ձեռնարկատիրական գործունեության իրականացումը և դրա արդյունքում ստացված շահույթի կամ կրած վնասի առկայությունը:

9. Սույն վարույթի շրջանակներում Հանձնաժողովը վերլուծում է վարույթի հարուցման հիմք հանդիսացող՝ Արմեն Չարչյանի կողմից «ԱԼՄԱԶ-1» ՍՊ ընկերությունում իր բաժնեմասը հավատարմագրային կառավարման չհանձնելու հարցի վերաբերյալ ձեռք բերված փաստական տվյալները և դրանց վերաբերելի իրավակարգավորումները:

Այսպես, ձեռք բերված փաստական տվյալ է այն, որ «ԱԼՄԱԶ-1» ՍՊ Ընկերությունը 2021 և 2022 թվականների ընթացքում իրացման շրջանառություն չի ապահովել: Վարույթի իրականացման շրջանակներում ձեռք բերված մեկ այլ փաստական տվյալի համաձայն՝ Ընկերությունը 2021 և 2022 թվականների ընթացքում հարկվող շահույթ չի ապահովել (<< Պետական եկամուտների կոմիտեից ստացված տեղեկատվություն): Տվյալ պարագայում, թեև Ընկերության գործունեության դադարեցման վերաբերյալ տվյալներ առկա չեն, այնուամենայնիվ Ընկերությունը 2021 և 2022 թվականների ընթացքում **փաստացի գործունեություն չի իրականացրել, իրացման շրջանառություն, ինչպես նաև շահույթ չի ապահովել:**

10. Հանձնաժողովն էական է համարում նաև այն հանգամանքը, որ Արդարադատության նախարարության իրավաբանական անձանց պետական ռեգիստրի գործակալությունից ստացված տեղեկատվության համաձայն՝ Արմեն Չարչյանն Ընկերությունում իր բաժնեմասնակցության փաստով պայմանավորված՝ նշված ժամանակահատվածում որևէ մասնակցություն չի ունեցել Ընկերության կառավարման գործառույթների իրականացմանը կամ այլ կերպ ներգրավված չի եղել Ընկերության կողմից կայացվող որոշումներում:

Ելնելով վերոնշյալից, Հանձնաժողովն արձանագրում է, որ Ազգային ժողովի պատգամավորի պաշտոնի ստանձնումից հետո Արմեն Չարչյանն Ընկերությունում իր բաժնեմասը գործող օրենսդրական իրավակարգավորումներին համապատասխան հավատարմագրային կառավարման չհանձնելու պարագայում փաստացի ձեռնարկատիրական գործունեություն, այն է՝ որոշակի գործողություններ չի իրականացրել, շահույթ չի ստացել:

Հանձնաժողովն էական է համարում նաև այն հանգամանքը, որ առևտրային կազմակերպությանը մասնակից լինելուն զուգահեռ պաշտոնատար անձի կողմից փաստացի չի պահպանվել նաև իր ազդեցությունն առևտրային կազմակերպության գործունեության նկատմամբ, քանի որ վերջինս, ըստ էության, շահույթ հետապնդող ձեռնարկատիրական գործունեություն չի իրականացրել, ինչպես նաև որևէ ձևով ներգրավված չի եղել «ԱԼՄԱԶ-1» ՍՊ ընկերության կառավարման գործառույթների իրականացմանը: Հետևաբար, սույն վարույթով քննարկվող հարցի շրջանակներում Արմեն Չարչյանի կողմից իր ստանձնած պաշտոնի հետ անհամատեղելի գործունեություն փաստացի չի իրականացվել:

«Վարչարարության հիմունքների և վարչական վարույթի մասին» օրենքի 7-րդ հոդվածի 1-ին մասի համաձայն՝ (...) Վարչական մարմինները պարտավոր են անհատական մոտեցում ցուցաբերել **էապես տարբեր փաստական հանգամանքների** նկատմամբ:

«Վարչարարության հիմունքների և վարչական վարույթի մասին» օրենքի 7-րդ հոդվածի 2-րդ մասի համաձայն՝ եթե վարչական մարմինը որևէ հայեցողական լիազորություն իրականացրել է որոշակի ձևով, ապա միանման դեպքերում հետագայում ևս պարտավոր է իր այդ հայեցողական լիազորությունն իրականացնել նույն ձևով:

Նշված իրավանորմով պայմանավորված՝ Հանձնաժողովն անհրաժեշտ է համարում անդրադառնալ այն հանգամանքին, որ Հանձնաժողովի կողմից 2020 թվականի մարտի 6-ի թիվ 06/2019 եզրակացությամբ հաստատված փաստական հանգամանքների և սույն գործով հաստատված փաստական հանգամանքների միջև էական տարբերություն առկա չէ:

Վերոնշյալ փաստերի վերլուծությունը հանգում է նրան, որ Արմեն Չարչյանի կողմից բովանդակային առումով չեն խախտվել հանրային պաշտոն զբաղեցնող անձին ներկայացվող անհամատեղելիության պահանջները:

Սույն վարույթի շրջանակներում պարզված փաստական հանգամանքների համադրումից և վերոնշյալ իրավական նորմերի վերլուծությունից Հանձնաժողովը **եզրահանգում է**, որ սույն գործով քննարկված՝ «ԱԼՄԱԶ-1» ՍՊ ընկերությունում Արմեն Չարչյանի կողմից իր բաժնեմասը հավատարմագրային կառավարման

չհանձնելու հարցի վերաբերյալ փաստական հանգամանքների շրջանակներում, Արմեն Չարչյանն իր գործողություններով չի խախտել Օրենքի 31-րդ հոդվածի 1-ին մասով հանրային պաշտոն զբաղեցնող անձի համար սահմանված անհամատեղելիության պահանջները:

Հաշվի առնելով վերոգրյալ հիմնավորումները և ղեկավարվելով «Կոռուպցիայի կանխարգելման հանձնաժողովի մասին» օրենքի 22-րդ հոդվածի 1-ին մասի 2-րդ կետով, 24-րդ հոդվածի 1-ին մասի 1-ին կետով, 33-րդ հոդվածի 2-րդ մասով՝ Հանձնաժողովը, գնահատելով գործում առկա ապացույցները, բոլոր հանգամանքների համակողմանի, լրիվ և օբյեկտիվ հետազոտման վրա հիմնված ներքին համոզմամբ՝

ԵԶՐԱԿԱՑՆՈՒՄ Է.

Ազգային ժողովի պատգամավոր Արմեն Չարչյանի կողմից չեն խախտվել հանրային պաշտոնին օրենսդրությամբ ներկայացվող անհամատեղելիության պահանջները:

ՀԱՆՁՆԱԺՈՂՈՎԻ ՆԱԽԱԳԱՀ՝



ՀԱՅԿՈՒԿԻ ՀԱՐՈՒԹՅՈՒՆՅԱՆ